

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- प्रधानमंत्री नरेन्द्र मोदी होर बक्ख-बक्ख सरकारी मैह्कमें च नमें नियुक्त कीते गेदे नौजवानें गी अज्ज वीडियो कांफ्रेंस दे राहें नियुक्ति पत्तर बंड्डडन।
- भारत ते कुवैत नै आतंकवाद दी सख्त निंदेआ करदे होई आतंकवाद-रोधी अभियानें ते साईबर सुरक्षा दे खेत्तर च सैह्योग बधाने पर सैहमति जताई ऐ।
- जम्मू-कश्मीर पुलसै, पच्छिम बंगाल दी एसटीएफ आसेआ गिरफ्तार कीते गेदे पाकिस्तान च सिखलाई हासल आतंकवादी गी अपनी हिरासत च लेई लैता ऐ।
- मुख्मन्त्री ओमर अब्दुल्ला होरें आखेआ ऐ जे उंदी सरकार, जम्मू-कश्मीर च आरक्षण नीति सरबंधी चैताएं गी दूर करने लेई वचनें बज्झी दी ऐ।
- केन्द्री मंत्री डाक्टर जीतेन्द्र सिंह होरें आखेआ ऐ जे भारत अज्ज दुनिया दे अगुआ देशें च शामिल होई गेदा ऐ ते इक वैश्विक नेता दे तौर पर उभरियै सामने आवै करदा ऐ।

<><><><><><>

PM-Rozgar Mela

प्रधानमंत्री नरेन्द्र मोदी होर अज्ज वीडियो कांफ्रेंसिंग राएं नमें नियुक्त भर्थिएं गी 71 ज्हार कोला मते नियुक्ति पत्र सौंपगन। श्री मोदी होर इस मौके पर किट्टे गी बी संबोधत करगन। आकाशवाणी संवाददाता नै दस्सेआ ऐ जे इस रोजगार मेले दा आयोजन देश भर च 45 थाहरें पर कीता जाग। रोजगार मेला अक्टूबर 2022 च शुरू कीता गेआ हा ते हुनै तगर 50 शैहरें च राष्ट्रीय स्तर पर इस चाल्ली दे 13 मेलें दा सरिस्ता कीता गेआ ऐ। इनें मेलें च नोजवानें गी लक्खें दी गिनतरी च नियुक्ति पत्र जारी कीते गे न जेहड़े बक्ख-बक्ख सरकारी मैह्कमे ते मंत्रालयें च खाल्ली असामिएं गी भरने दी दिशा च इक गैह ऐ। एह रोजगारी मेला नोजवानें च रोजगार नैदा करने गी सर्वोच्च प्राथमिकता देने दी प्रधानमंत्री हुंदी वचनबद्धता गी पूरा करने दी दिशा च इक गैह ऐ।

<><><><><><>

India Kuwait

भारत ते कुवैत नै इक्कै स्वर ते इक राय कन्नै आतंकवाद, भाएं ओ कुसै बी रूपै च कीह नेई होए ओहदी निंदेया कीती ऐ। दौनें मुख्य बन्ने पारा चलाए जाने आले आतंकवाद दी बी सख्त निंदेया कीती ऐ ते इस गल्लै दा आह्वान कीता ऐ जे आतंकवादिएं गी रपेया पैहा उपलब्ध कराने, तंत्र ते उनेंगी सुरक्षत आसरमे ते मदद कराने आले ढांचे गी खत्म कीता लोना लोड़चदा। प्रधानमंत्री नरेन्द्र मोदी जेह्दे दऊं दिनें दे कुवैत दौरा पर कल मुख्य परतोए न। उंदे दौरे बारे विदेश मंत्रालय आस्सेआ जारी ब्यान च आखेआ गेआ ऐ जे दौनें मुख्य आतंकवाद रोधी कारवाइएं च इक दुए कन्नै सैहयोग बधाने दा धेइयै पक्का कीता ऐ ते एह्दे लेई कटरवाद पर रोक लाने, साइबर सुरक्षा सरबंधी चुनौतिएं कन्नै निबड़पे ते किट्ठे रलिसयै आतंकवाद रोधी कारवाइएं गी अंजाम देने बारे बी सलाह सूत्र कीता।

<><><><><><>

Pak Millitant Arrest

जम्मू कश्मीर पुलसै पाकिस्तान च सिखलाई हासल कीते दे इक आतंकवादी जावेद मुंशी गी अपनी हिरासतै ख लेई लैता ऐ जिसी पच्छिम बंगाल दे विशेष कार्यबल एसटीएफ नै दक्खन 24 परगना इलाके च बंगलादेश कन्नै नगदे बन्ने कशा गिरफ्तार कीता हा। इस आतंकवादी दा सरबंध तहरीक—उल—मुजाहिदीन नां दे आतंकी संगठन कन्नै ऐ ते इन्ने आईईडी ते बक्ख—बक्ख दे थेआरें दे इस्तेमाल दी सिखलाई लैती दी ऐ। लश्करे तैयबा आतंकी संगठप दे बड़्हे आतंकी सरगनाएं दे निर्देश पर ओ बंगलादेश च घुसपैठ करने दी तक्कै च हा। जम्मू कश्मीर पुलसै उसी अपनी हिरासतै च लेई लैता ऐ ते अग्गे दी जांच ते पुच्छ—पड़ताल लेई उसी जम्मू कश्मीर आंदा जाग।

<><><><><><>

JK Forests

केन्द्री पर्यावरण मंत्री भूपेन्द्र यादव हुंदे आस्सेबआ हाल च गै जारी रिपोर्ट आईएसएफआर—2023 मूजब जम्मू कश्मीर दियां त्रै शानदार उपलब्धियां सामने आइयां न। रिपोर्ट दे मताबक जम्मू कश्मीर गी सब्बने शा मती उत्पादकता आले जंगलात संसाधने दा प्रदेश घोशत कीता गेआ ऐ। एह्दे अलावा जम्मू कश्मीर दा जंगलात उत्पादन बी हेक्टर परती सब्बने शा मता 296 इशारिया 22 रिकार्ड कीता गेआ ऐ। इन्ना गै नेई जम्मू कश्मीर दा कार्बन स्टोक बी इक हेक्टर पिच्छे 174 इशारिसया 10 टन दर्ज कीता गेआ ऐ जेह्इदा श्रेय बी इत्थुं दे जंगलात गी गै जंदा ऐ। एह्दे कन्नो कन्नी जम्मू कश्मीर च जंगलात दे इलाकें च बी 34 इशारिया 78 वर्ग किलोमीटर दा बाद्धा होआ ऐ।

इस उपलब्धि कन्नै बधे दे हौसले ते खुशी गी मनाने लेई जंगलात मैह्कमे नै अपने प्रिंसिपल चीफ कन्जरवेटर बी.के.सिंह हुंदी अगुवाई च नरवाल दफतर परिसर च बूहटे लाने दे चबक्खिया केई पारम्पारिक परजातिएं दे बूहटे लाए गे।

<><><><><><>

Div Com JKL Mahotsav

जम्मू दे डिवीजनल कमिशनर रमेश कुमार होरें कल जीजीएम साईस कॉलेज च जम्मू-कश्मीर लद्दाख महोत्सव 2024 दे समापन समारोह च हिस्सा लैता। इस महोत्सव दरान जम्मू, कश्मीर ते लद्दाख खित्तें दी समृद्ध सांस्कृतिक विरासत, कला, परंपराएं ते मुकामी खान-पान पर लोऽ पाई गई। डिवीजनल कमिशनर होरें इस चाल्ली दे महोत्सव दे आयोजन लेई कीते गेदे जतनें दी सराहना कीती। उनें सांस्कृतिक आदान-प्रदान ते त्रौनें खित्तें दिएं अनोखी परंपराएं दी सांभ-संभाल लेई इस चाल्ली दे आयोजनें दे महत्वै पर जोर पाया।

<><><><><><>

Vocal for Local

प्रधानमंत्री हुंदी वोकल फॉर लोकल आहली पैहलकदमी मूजब अगगे बधदे होई राई-बाई सरबंधी बपार आहले पेशेवरें दी भारती समिति आसेआ कल डोडा जिले दे भद्रवाह च खरीददारें ते विक्रेताएं दी इक बैठक दा आयोजन कीता गेआ। इस आयोजन नै मुकामी करसानें गी इक बड़ा बधिया मंच उपलब्ध करोआया जेह्दे राहें उनें अपने राई-बाई उत्पादें दा प्रदर्शन कीता ते उनें गी खरीददारें कन्नै सिद्दे तौर पर मिलने दा इक मंच बी हासल होआ। इस पैहलकदमी दा मकसद मुकामी उत्पादें गी बढ़ावा देना ते करसानें ते खरीददारें बश्कार संपर्क बधाना ऐ तांजे खित्ते दी राई-बाई अर्थबवस्था गी होर उबड़ा चुक्के जाई सकै। इस मौके स्हाड़े संवाददाता कन्नै गल्ल करदे होई समिति दे प्रोजेक्ट कोआर्डिनेट डाक्टर राहत वाणी होरें आखेआ

<><><><><><>

CM Reservation

मुख्यमंत्री उमर अब्दुल्ला होरें जम्मू कश्मीर दे लोकें गी जकीन दोआया ऐ जे उंदी सरकार इत्थें आरक्षण नीति गी लेइयै बनी दिएं चिंताएं गी दूर करने लेई पूरी चाल्ली दृढ़ संकल्प ऐ। इक सोशल मीडिया पोस्ट पर मुख्यमंत्री होरें आखेआ जे उंदी पार्टी नै चुनां कोला पैहले जे पक्का धेइया कीते दा ऐ जे इस मुद्दे दी ओ जांच करोग, जिस करियै कैबिनेट दी उप-कमेटी बनाई गई ऐ जेह्ड़ी इस मुद्दे दे नबेड़े लेई बनकदा हल्ल तुप्पी कड्डने लेई बक्ख-बक्ख पैहलुएं पर सोच बचार करोग।

मुख्यमंत्री होरें आखेआ जे आरक्षण पॉलीसी दी हाई कोर्ट च नजरसानी होआ करदी ऐ ते सरकार अदालतें दे फैसले गी मन्नदे होई कोई मुकदा फैसला लैग। उनें आम जनता अगो अपील कीती ऐ जे ओ सरकार दे जतनें पर भरोसा रखन।

<><><><><><>

CM Kashmir

जारी जबरदस्त ठंडू दे प्रकोप दे चलदे मुख्यमंत्री उमर अब्दुल्ला होरें घोषणा कीती ऐ जे कश्मीर घाटी च इस दरान मैहकमा बिजली दे कम्मकाज ते जरूरी सेवाएं पर नजर रखने लेई ओह इस पूरे हफ्ते श्रीनगर च गै रौहगन। इस बारे सोशल मीडिया मंच एक्स पर इक दे बाद इक जारी केई सारे संदेशें च मुख्यमंत्री अब्दुल्ला होरें घाटी च एल्ले चला'रदी बड़ी मती ठंडू दे प्रकोप दरान लोकें गी पेश औने आलिएं दिक्कतें गी दूर करने दे अपने धेइयै गी फही पक्का कीता। श्रीनगर च हाल च गै घट्टोघट्ट तापमान सिफर कोला साढ़े 8 डिग्री हेठ 50 ब'रें च सब्बने शा ठंडी रात रेही।

<><><><><><>

Dr. Jatinder Singh

केन्द्री मंत्री डॉ. जितेन्द्र सिंह होरें आखेआ ऐ जे प्रधानमंत्री नरेन्द्र मोदी हुंदे नेतृत्व च भारत दुनिया दा इक अगुवाह मुख्य बनी गेदा ऐ ते एहदी गिनतरी अज्ज दुनिया दे गिने चुने दे श्रेष्ठ मुख्यें च होंदी ऐ। डोगरी मानता ध्याड़े दे सिलसिले च कल जम्मू च आयोजित इक समारोह दरान बोलदे होई उनें नोजवानें गी आखेआ जे अपनी भाषा, कला ते संस्कृति पर मान करदे होई अपने शानदार इतिहास ते विरसे गी कन्नै लेइयै अगड़े बघदे होई 2047 तगर भारत गी इक विकसित मुख्य बनाने च बी ओह अपना योगदान देन.....

<><><><><><>

Javed Rana Reviews

जल शक्ति, जंगलात ते पर्यावरण सने जनजातीय मामलें आहले मैहकमे दे मंत्री जावेद अहमद राना होरें कल बागे—बाहू इलाके च पानी गी साफ करने सरबंधी बोरिया फिल्ड्रेशन प्लांट दा निरीक्षण कीता। अपने दौरे दरान मंत्री होरें इलाके च पेदी गंदगी पर चैंता बुज्जदे होई साफ—सुथरे इलाकें दी जरूरतें पर जोर पाया। उनें जम्मू—कश्मीर च साफ—सफाई ते खूबसूरती बरकरार रखने दे निर्देश जारी कीते। मंत्री होरें पानी दा मय्यार बरकरार रखने ते पानी दी नियमित जांच दी जरूरतें पर बी जोर दित्ता तांजे लोकें गी नियमित तौर उप्पर पीने आहला साफ पानी बरोबर थोंदा रवै।

तोआई जावेद राणा होरें कल जम्बू जू च उपलब्ध सुविधाएं दा बी जायजा लैता ते उत्थे जनौरें दी उचित दिक्खभाल, सैलसफा गी बढावा देने ते सांभ-संभाल सरबंधी असरदार जतनें दी जरूरतै पर जोर पाया। उनें अधिकारिणं गी निर्देश दित्ता जे ओह उत्थे औने आहले लोकें गी बेह्तरीन सुविधां उपलब्ध करोआना जकीनी बनान।

<><><><><><>